

IGNACIO ESCRIBANO-EFE



### Familia bateko hiru kide hil dira kotxe istripuan, Tuteran

Senar-emazte batzuk eta beren semea hil ziren atzo, eguerdian Tuteran (Nafarroa) jazo zen kotxe istripuan. Tuterako Reina Sofia ospitalearen parean jazo zen ezbeharra, N-232 errepidean. Errioxako Alfaro udalerrikoak ziren istripuan hil ziren senar-emazteak —Luis Daniel G.C. 40 urtekoa eta Maria Pilar D.H. 36 urtekoa— eta haien semea —Luis Daniel G.D., hiru urtekoa—. Istripuan, elkar jo zuten familia zihoan kotxeak eta beste bi kamioik; kamioi gidari biak osorik irten ziren ezbeharretik. Guardia Zibilak jakin arazi duenez, argitzeke dago istripua zerk eragin zuen.

## 'Euskonews & Media' astekari elektronikoa argitaratu du Eusko Ikaskuntzak

*Internet bidez irakur daiteke zientzia eta kulturari buruzko astekari berria*

**A**tzoz geroztik Eusko Ikaskuntzaren *Euskonews & Media* astekari berria irakur daiteke Interneten. Euskal kultura eta zientziari buruzko artikulua ugari azaltzen dira bertan, eta, gainera, Eusko Ikaskuntzak irratietan antolatzen dituen solasaldiak entzuteko aukera eskaintzen du. Gainera, hilean behin gai baten inguruko monografikoa egingo dute.

Ainhua Oiarzabal / Donostia

ATZO aurkeztu zuten Donostiako Miramar jauregian euskal kultura eta zientziari buruzko aldizkari berria: *Euskonews & Media*. Atzoz geroztik astero Internet bidez zabalduko dute argitalpenak, eta Eusko Ikaskuntzak sortu du.

Eusko Ikaskuntzako Gipuzkoako lehendakariorde Lola Valverdek adierazi zuenez, gizartearen beharretara egokitu nahi izan dute. Eta horixe da, hain zuzen, argitalpen berri eta berritzailea kaleratzeko arrazoia; «izan ere, kultur arloan aurrera egiteko egungo baliabideak erabili behar dira», adierazi zuen Valverdek.

Euskal Ikaskuntzako gerente Josemari Velez de Mendizabalek eman zuen astekariaren edukia- ren berri, eta harpidetza egiteko

aukera dagoela nabarmendu zuen: «Harpidedunei egin bezain laster bidaliko diegu astekaria». Horretaz gainera, astekari elektronikoa ISSN izena eta Europako dirulaguntza jaso duela azpimarratu zuen. «Hala ere, aurrerantzean astekariaren gastuak publizitatearen bidez ordainduko ditugulakoan gauden».

**Irakurleen txokoa zabalik** • Bi kazetarik, hiru berriemai berezik eta hainbat kolaboratzailek egingo dute lan *Euskonews & Media* astekarian. Besteak beste, elkarrizketak, hainbat gairi buruzko artikulua eta kultur iritziak agertuko dira astekari elektronikoa. Aste honetakoan Jorge Oteiza eskulturgileari egin

diote elkarrizketa. Horretaz gainera, *Irakurleen txokoa* izeneko atala zabalik dago astekari elektronikoa, nahi duen orok bere iritziak eta artikulua bidaltzen. «Izan ere, Eusko Ikaskuntzak argitaratzen baldin badu ere, astekaria ez da horrena soilik; *Euskonews & Media* euskal kultura eta zientziari buruzko berriak mundu osoan zabaltzeko argitalpena da». Gutxienez lau hizkuntzatan idatzitako artikulua argitaratuko dituzte aldizkarian, baina hori bai, euskarari emango diote lehentasuna.

Idatzitako bidaltzeko edota astekaria irakurtzeko, bi bide daude: batetik, Eusko Ikaskuntzaren web orrira sartuta; eta bestetik, *Euskonews.com* web orria zabaldua. Eusko Ikaskuntzaren

gerentearen hitzetan, 2.000 lagun sartzen dira astero beren web orrian, «astekari berria dela eta, kopuru hori biderkatzea espero dugu», zehaztu zuen Velez de Mendizabalek.

Astekariak jaso eta sarean gordeko dituzte denboraldi batean, «aurreko 15 asteetako aldizkariak irakurtzeko aukera izango da aste bakoitzean». Horretaz gainera, Eusko Ikaskuntzak Euskal Herriko hainbat irratitan egiten dituen solasaldiak entzuteko aukera dago astekariaren bitartez, solasaldiak grabatu eta astekari elektronikoa gordeko baitituzte. Bestalde, hileroko monografiko bat egingo dutela azaldu zuten, eta irailekoa Donostiako Zinemaldiari buruzkoa izango dela. X

### Nagore Santamariak jasan zuen eraso salatzeke eskatu dio Santurtziko IU Udalari

■ Ustezko erasotzailea, emakumearen senarra, aske dago

Europa press / Bilbo

SANTURTZIKO IU alderdiak Nagore Santamaria herritarak jasan zuen eraso salatzeke eskatu dio Santurtziko Udaleko Bozeramaileen Junta. Santurtziko alderdi horren ustez, Kode Penal berriaren aldaketa eta tratatu txarrak jasaten dituzten emakumeentzako harrera etxeak behar-beharrezkoak dira aipatu erasoaren auzia konpon-tzen hasteko.

Joan den abuztuaren 24an izan zuen eraso Nagore Santamariak, F.B.F. senarraren eskutik. Erasoaren ondorioz, saihestu bat hautsi zion emakumeari, eta lepoan, ezpainetan eta begian zauriak eragin zizkion. Gizona aske dago, epaiketaren zain. X

### Emakume bat bortxatu duelakoan, gizonezko bat atxilotu dute Donostian

Erredakzioa / Donostia

J.R.P.M. 43 urteko gizonezkoa atxilotu zuen Ertzaintzak astelehenean goizean, emakume bat bortxatu duelakoan.

Ertzaintzaren iturrien arabera, bortxaketa joan den igandean jazo zen, biktimaren etxean. Emakumeak ezagutzen zuen gizona; izan ere, harreman sentimentalak eduki zituen garai batean ustezko bortxatzailearekin.

Herrizaingo Sailak azaldu duenez, behin bortxaketa egin ondoren emakumearen autoa hartu eta alde egin zuen gizona. Emakumeak, berriz, forentsearengana joan ostean, salaketa jarri zuen gizonaren kontra, Donostiako epaitegian. Ondorioz, ustezko bortxatzailea atxilotuta dago. X

### SEASKA, Iparraldeko Ikastolen Elkarteak,

bere Kanboko Xalbador Kolegioarentzat, **TEKNOLOGI** posturako **ordezkari** bat bilatzen du, 8 ordurekin astean eta segidan hasteko.

**BETETZEKO DIREN BALDINTZAK:**

- Teknologirako Lizentzia.
- Euskararen ezagutza on bat baita ere frantsesarena.

*Interesatuak direnak, idatz dezatela 98ko irailaren 19a aintzin Seaskara motibapen gutun bat + CV bat igorri (ez ahanztu telefono zenbaki baten azaltzea).*

**Seaska - Central Forum Pontots Bidea  
64100 BAIONA helbidera**



### SARRERA BERRIKO IKASLEEN MATRIKULA

Nafarroako Unibertsitate Publikoak jakinarazten du irailaren 7an argitaratutako bigarren zerrendetan onartutako sarrera berriko ikasleek 1998-99 ikasturterako matrikula egiteko egutegia **Unibertsitateko Ikasgelategiko Beheko Solairuan** jarrita dagoela, onartutakoen zerrenden ondoan.

Matrikula Administrazio eta Kudeaketarako eraikinean egingo da, aipatu egutegian adierazitako egun eta orduaren arabera. Ikasleek, aldez aurretik, matrikula-gutunazala eta ikaslearen gida jaso beharko dituzte Unibertsitateko Ikasgelategian kokatutako informazio mahaitik.